

Ricuardant, un an dopo

Al è prest un an ch'a tu sês lâ t zidin pai trois di un altri mont plen di misteri. Un an e mi somea iar. Se lagrimis, se dolôr. Ancja li' cjampanis a vaivin di passion senza padin. Al era misdî plen di soreli e, a tramontan, li' montagnis plui altis blancjis di nêf, a slusivin come l'arint. Che' montagnis che tu âs cjantât cun rimis d'amôr par duta la vita, a si erin fatis viodi in dut 'l lôr sflandôr. Daûr di te un flun in plena par compagnâti tal ultim to viaz. D'inchel di tantis robis a son cambiadis. Al mont intêr al è 'na bora. Fûcs di vuera par ogni cjanton. Al è dut un savolton imbastît dai oms ch'a stentin a capîsi. Mi pâr di vioditi menâ 'l cjâf avilît, complanzi li' miseriis da umanitât cumò, plui che mai, fûr cul cjâf. Sâstu, un altri galantom grant amî di Guriza, in particolâr di Borc San Roc, al è tornât intai braz di Diu. Al era un om vignût di lontan, stimât e ben uarût di dutis dôs li' entîs ch'a cunvivin in chista zitât di cunfin. Ancja par lui e pai trôs di lôr, lâts laiù dai pins, un "Requiem" di cûr.

Vuê, in chistis pagjinis a mancja purtrop, la tô vôs che nô supavin come li' âs la mêl di rosa in rosa. Ai lêt e soi tornada a lei, simpri plui ingusida, al to ultim scrit in biel furlan. Un salût in forma di metafora spissulât fûr dal cûr plen di puisia ch'al nus à tocjât l'anima a font. Sôl un om come te preparât al pàs finâl, cussient, che la sô ora a jera rivada, al podeva esprimisi cun tanta

dignitât. Butât al voli sun chê slargjura di cjamps e di prâts ch'a formin al Prevâl orlât di culinis ricamadis di filârs di ua, in ca e in là animadis di paisuts blancs veglâts dai tôrs (un timp fuartezzis cuntra i Turcs), tu vevis cjatât la vena justa par cjantâ ancjamò una volta la tô lauda al Creatôr. Chel vencjâr cressût bessôl in miez di chê planura, batût e scoreât da intemperiiis, roseât dal carûl suturno ch'al lu puartarà a la fin dai sioi dîs, al veva ancjamò alc di bon di fâ. Chel vencjâr a tu eris tû.

Vuê li' sisilis a son za ladis di là dal mâr e al è rivât pai contadins al timp da vendemis. Un bon racolt a sunsurin gongolant. E in chist timp di sierada là che a s'ingrumin i racolts sotet, eco un segno di speranza ancja pai Furlans, ch'a viodin viarzisi una quarta in Parlament. Chista marilenga supada sui zenoi di nestra mari, tû, tu la jâs valorizada in plen. Tu âs conferîtigi dignitât, innomina e un vistît leterari sorafin al pâr di altris fevelis plui cognossudis. Îsal forsi al to cjant la ultima bugada di profum ch'a si respira, prin che li' gjenerazions gnovis a dispiardin chist patrimoni di grant valôr, scancelant par simpri la nestra identitât?

Se dûl di cûr pensant al doman. Forsi no san che in curt, ancja al talian e li' altris lenghis europeanis a saran i dialets da Europa unida co al inglês al deventerà, par necessitât, la lenga uficiâl dal Continent. Tu mi mancjis Celso.

Mi mancja la tô prisinza ch'a mi infondeva sigurezza: «Scrîf in marilenga che par talian a son za in tancj a scrivi». Consei di om savint ch'al mi sbusina ancjamò inta orelis. Al jera biel cjatâsi insieme cun te e la tô Laura, lunc li' stradis di Europa in compagnia di un grum di amîs in zêrcja di olmis di una granda civiltât leada di secui a la nestra. Incjisîfs i tîoi intervents a conclusion da visitis ai lûcs imbombâts di storia. Ducj ti scoltavin a bocja viarta. Forsi al flum nol mûr se un grum di riûi a si son fats strada par ingruessâlu di planta fûr. Un biel numar di scuelis di furlan in duta la Region e tanta voia di studiâlu.

Tu nus mancjaràs, in novembar, a la fiesta pai 80 ains di fondazion da Filologjica nassuda propi a Guriza tal 1919. Propi tû, che tu la jâs tignuda in palma di man la lenga di tô mari; che tu âs butât puints di amicitia sul Lusinz par incontrâ in pàs i fradis di cunfin; che tu âs esaltât la onestât e 'l mont contadin di dulà ch'a tu sês vignût fûr; che tu âs cjantât come nissun altri, li' aghis colôr dal zîl dal nestri flum. Tû, amî di pocjis peraulis plenis di bon sens, tolerant simpri, tu saràs ancjamò cun nô in spirt. Fevelaran par te, chê schiria di oparis che tu nus âs lassât. Lôr ti mantegnaran simpri vîf e, come ch'a dîs la letura sacra, tû che tu âs samenât inta lacrimis, tu cjaparàs sù cul timp in ligria.

Anna Bombig

(furlan di Fara)